

Otmar Oduber:

“E evaluacion si bin un partido nobo of si ta uni na un partido, mi no ta exclui nada”

Despues di cuatro aña cu el a retira for di politica y manera Bon Dia Aruba a informa recientemente, Otmar Oduber ta back den politica unda e ta sigura cu nunca el a pensa di bin back den area aki, sinembargo, loke el a pasa den añanan aki pa cu e caso Flamingo a impacta su bida y decisionnan cu no tabata contempla algun aña pasa ta contempla na e momentonan aki manera el a sigura.

Den un entrevista extenso cu Bon Dia Aruba a tene cu Oduber a expresa cu mirando e desaroyonan den caso Flamingo na unda te ainda su persona ta involucra, el a señalala cu ta un abuso di poder loke ta tumando luga y esey combina cu e sentimentonan despues di cuatro aña trahando den sector priva, e ta considera cu su persona ainda tin mas contribucion pa haci y su experiencia den sector priva combina cu e experiencia cu e tabatin den gobierno “mi ta kere cu tin un par di aña cu mi por contribui hopi na nos pais ainda.”

Di loke ta trata su ex-partido POR, el a sigura cu e no a distancia su mes di e partido sino cu prome el a tuma e decision di retira den seno familiar y despues cu esnan cu tabata su consehero hunto cu Andin Bikker ken tabatin e co-liderazgo di e partido unda e prome motibo tabatin relacion cu su salud, el a haci un operacion di stoma pa motibo di presion y despues di e operacion el a confronta un otro problema cu su esofago cu ta traha na 50% y ta deteriora poco poco y e ora ey Bikker a dicidi di asumi liderazgo di e partido.

Igualmente el a informa cu no tin un partido nobo, ya cu ta existi hopi rumor si el a bay notario, entre otro, “e evaluacion si bin un partido nobo of si ta uni na un partido, mi no ta exclui nada na e momentonan aki,” ya cu e pensamiento cu mi ta bin cune di e Otmar di añanan pasa ta diferente cu esun di awor, “Aruba ta na un punto cu nos mester unifica pa por logra cambionan no ta un cuestion di pasobra mi ta oposicion, manera ta sosodiendo aworaki, mi meta ta pa critica gobierno, baha e gobierno pa mi bin na



poder, y si mi ta den gobierno y den parlamento mi meta ta pa defende gobierno cueste lo que cueste pasobra nos kier keda den gobierno, nos no ta na e punto ey mas, awor nos mester ta hunto y unifica por ehemplo, pa por enfrenta Hulanda, nos tin cu defende nos interesnan, interesnan cu nos mes, mi tin cu admiti cu durante 40 aña cu nos tin status aparte, no a percura pa duna Hulanda e confiansa pa nos mes por haci nos mesun cosnan, sino, nos no tin e debe cu nos tin awe, sino nos no tin e decadencia cu nos tin den comunidad awe.”

“Mester pone Ursell Arends responsabel pa e caso di Embassy Suites”
Tocante e pregunta cu redactor a haci e cual a referi si su persona ta esun cu a compromete cu hotel Embassy Suites pa duna nan un beach, el a expresa cu Embassy Suites ta un proyecto cu a cuminsa algun aña pasa ora Marisol Lopez-Tromp tabata den partido MEP el a comprometi y despues Benny Sevinger a duna nan un expansion di tereno y na momento cu

Oduber a asumi su responsabilidad “mi tabatin un petition di Embassy Suites pa loke ta trata expansion di e beach, nan a bin cu proposicion pa bin cu un tunnel of un brug pa nan huespednan por crusa di un manera mas sigur, nos a ricibi conseho pa traha un tunnel pa loke ta trata expansion di e beach e conseho tabata positivo, pasobra e awa di e area eybanda practicamente no tin bida y esey tabata e conseho di departamentonan unda a duna conseho di kico si tabatin y loke tin presente ban mira con nos por cuid’e.”

Su persona ta esun cu a implementa e Beach Policy segun el a informa, nan tabata controla, nan a kita hopi palapa y nan no a duna mas permiso pa pone mas palapa riba beach, pa loke a nenga e petition na Embassy Suites pa nan por esakinan tambe.

Di e tema aki Oduber ta señalala cu hopi hende ta confundí, tin dos punto den esaki caminda su ponencia ta cu “nos no ta trata e inversionistanan di e forma cu

nos ta trata nan na Aruba” y esaki ta varios motibo, Aruba ta importa 95% di e cosnan cu tin na Aruba y turismo tambe ta forma un parti importante di esaki, “si bo como mandatario cu ta un continuacion di gobernacion, bo ta sinta den un gobernacion di gobierno caminda e proyecto aki tabatin tur su permisonan di construccion, operacion, naturalesa, bo propio prome minister cu awe ta bo colega a duna e permiso necesario, loke tur hende ta confundí aworaki cu e beach ta cu no ta un beach ta di Embassy, e beach ta di pais Aruba, loke Embassy a pidi ta pa nan riba gasto expande e propiedad aki di gobierno como doño di e tereno bao condicionnan y nos a pone den un carta e tempo ey pa corda cu e tereno y e beach ta keda publico.”

Pa su persona e discusion aki, si nan mester un aanlegvergunning of un ontheffing si of, ta irrelevante debi cu e beach ta di gobierno e ta, otro escenario ta e hotel cu ta na San Nicolas na Baby Beach unda a bora y a construi, nan a haya un aanlegvergunning, “pero

na final di dia hasta awe, ora un aanlegvergunning a ser duna door di minister di Infraestructura esey no por tuma luga sin e conseho di DNM y ora bo pidi un ontheffing, ta e mesun DNM tin cu conseha minister, kiermen den e caso aki ora bo ta wak e minister cu ta menasa su propio gobierno pa hiba nan corte, ta algo inadmisibel of bo tin cu tuma e decision cu bo tin cu retira pa principio pasobra bo tambe ta minister di Integridad y bo ta trek in pa evita cu tin un pelea paden pero bo ta sostene e mesun causa via un NGO cu no ta traha na interes di gobierno di Aruba sino cu nan ta defende naturalesa.”

Tambe el a enfatisa cu si mañan Embassy Suites mester lanta un caso contra pais Aruba pa motibo cu nan ta bay perde nan contract cu Hilton den e caso aki, Nature por bin un pone un klein y e ora e”mester pone minister den e caso aki cu pa mi, ta obstaculizando sin un base logico y legal, cu ta Ursell Arends mester para responsabel for di awor caba,” el a sigura.